

*Domaćice više zbori
i za svoje mjesto
se izbori!*

Pitanje godine **Zašto glasati za žene** na Općim izborima 2010
konačno dobija odgovor. Čak 101!

Glavne kuharice i kuhari:

Udruženje INFOHOUSE

TPO Fondacija

Fondacija CURE

Za provjeru recepata zadužena:

Branka Mrkić Rađević

Dizajn i štampa:

TRIPTIH DESIGN STUDIO

Tiraž:

20.000 kom

Godina 2010

U trenutku uzimanja izjava od poznatih ličnosti, autorima brošure sve intervjuisane ličnosti su izjavile da nisu angažovane niti u jednoj političkoj partiji, niti će biti kandidati na partijskim izbornim listama na Opštim izborima 2010.

Izjave poznatih ličnosti ne odražavaju nužno stav autora brošure, organizacija koje vode projekat niti njegovih donatora i partnera.

Zbog čega projekat “Osnazivanje uloge žena - 101 razlog zašto glasati za ženu”?

Od aprila do oktobra čak 13 organizacija iz Bosne i Hercegovine intenzivno će raditi na animiranju bosanskohercegovačkih žena da se sjete svog osnovnog ljudskog prava – prava da glasaju

Edukacija i javna kampanja, kojom će dominirati odgovori 101 poznate ličnosti iz BiH, naravno koje nisu aktivne niti u jednoj političkoj partiji ili je javno zastupaju, pomoći će ženama da razmisle žele li odlučiti ko će ih predstavljati u sistemu vlasti i ko će donositi odluke u njihovo ime iduće četiri godine.

Zašto?

Sve žene i muškarci u BiH uživaju ista prava o učestvovanju u političkom u javnom životu, što je garantovano Ustavom (Ustav BiH, Ustav FBiH te Ustavom RS-a).

Na papiru.

U stvarnosti?

Od 2002. procenat žena u tijelima državne vlasti opada!!!

Na predizbornim listama žene su zastupljene “u tragovima”.

Medijski natpisi i prilozi o ženama iz političkog života skoro da nepostoje.

Žene se veoma rijetko upuštaju u javne diskusije. Obično se drže tradicionalističkog stava “ovo je za nekog drugog, neka neko drugi pročitava ovo i odluči...., Ne mogu preuzeti odgovornost..”

I danas prevladava mišljenje da je ženama mjesto u kuhinji a ne politici, da je njihovo oružje kuhača i oklagija, a ne glas, te da ne može biti i majka i političarka...

Upravo ovim projektom želimo podstaći promjene stereotipnih načina razmišljanja žena u kuhinji a ne na izbornim mjestima. Ponudićemo ženama 101 argument od 101 ličnosti koje kreiraju javno mijenje kako bi razmislile o svom stavu prema izborima.

ŽENE ČINE 52 POSTO GLASAČKOG TIJELA. A GLASAJU U MANJEM PROCENTU NEGO MUŠKARCI.

ZAMISLITE DA ANIMIRAMO ŽENE OVE GODINE DA IZAĐU NA IZBORE. KAKO BI TAD IZGLEDALE REZULTATI OPĆIH IZBORA, ŠTA MISLITE?

Kako?

Samo zajedničkim naporom možemo podići svijest o važnosti uključenja žena u politički život ove zemlje i njihovog osnaženja. I zato ovaj projekat uključuje:

- 13 PARTNERSKIH ORGANIZACIJA IZ SVIH DIJELOVA BIH,
- 36 GRADOVA,
- 105 RURALNIH MJESTA
- 140 EDUKATIVNIH RADIONICA
- 11 JAVNIH DEBATA U 11 GRADOVA SA POZNATIM LIČNOSTIMA I ŽENAMA IZ TIH GRADOVA
- 101 POZNATU LIČNOST
- NA 20.000 KVADRATNIH METARA BIH
- I NAJVAŽNIJE, 3.000 DIREKTNIH I 20.000 INDIREKTNIH KORISNIKA PROJEKTA – ŽENA.

Kroz niz javnih debata, tv spotova, radio jinglova, uličnih akcija animiraćemo građane/ke da se zapitaju zašto od 2002 godine broj žena u tijelima državne vlasti konstantno opada, te koje su posljedice isključenja žena iz političkog života.

Nama nije u interesu ovom kampanjom promovirati neku političku opciju ili lidera. Naprotiv, želimo na objektivan, edukativan ali i javnosti zanimljiv način postaviti pitanje uloge žene na političkoj sceni upravo onima koje to pitanje najviše zanima – ženama. Samim tim i povećati njihovu izlaznost na izborima.

Ako i Vi djelite našu viziju, pridružite nam se na uličnim akcijama, edukacijama i diskusijama od maja do septembra ili bar virtuelno na www.101razlog.ba

U IME KONZORCIJA 13 UDRUŽENJA

TPO FONDACIJA, UDRUŽENJE INFOHOUSE I
FONDACIJA CURE

O 101 razlogu zašto glasati za ženu - partneri i donatori

Thomas Rüegg

direktor Švicarskog ureda za saradnju u BiH

“Tokom tranzicijskog perioda žene iz Bosne i Hercegovine pokazale su pasivan odnos prema izborima. Razloga je više, no time je nastao značajan vakuum u socijalno-političkom razvoju, a posebno u razvoju civilnog društva.

Ovaj vakuum se mora ispuniti kako bi se jednom važnom dijelu civilnog društva, ženama, dala potrebna pozornost, respekt i priznanje koje im pripada i dolikuje.

Žene će to nagraditi. One će se, sa puno inicijative i odgovornosti, angažirati na političkom, socijalnom i ekonomskom polju i znati kako da u pozitivnom smislu utiču na promjene. Jer, razvoj demokratskog i uravnoteženog

društva, koje treba da pruži sigurnost građanima i građankama nije moguć ako postoji samo uticaj muškaraca. Pozivam sve žene u Bosni i Hercegovini da neovisno i iz sopstvenih pobuda izađu na birališta.”

Mirela Grünther - Dečević,

direktorica Fondacije Heinrich Böll za BiH

“Neophodno je žene vratiti u društveno-politički život Bosne i Hercegovine, gdje će kao aktivni subjekti ravnopravno i konstantno učestvovati u kreiranju i provođenju politike, u odlučivanju, u državnim poslovima i svim drugim za sve građanke i građane Bosne i Hercegovine bitnim društveno-političkim procesima. Ženama je mjesto u politici i to svi moramo imati u vidu kada budemo odlučivali o tome kome dati svoj glas.”

Dr. Paul Pasch,

direktor Friedrich-Ebert-Stiftung u BiH

“101 razlog zašto glasati za ženu” je kampanja koja, s jedne strane, ima za cilj povećanje izlaznosti žena na izbore, a s druge strane, veći broj žena na političkim mjestima odlučivanja.

Postoji najmanje 1001 argument zašto bi žene trebale biti uključene u politiku i javni život, ali zapravo, samo jedan pravi razlog: da bi u planiranju i formulisanju politika bili uzeti u obzir i interesi, prava i potrebe žena (i porodica), u tijelima državne vlasti moraju biti izabrane žene, kako bi se mogao čuti i njihov glas.

U mnogim zapadnim društvima to se postiže rigoroznim uvođenjem ženskih kvota. Čini se da je to jedini mogući način da se stane na put procesima odlučivanja u kojima dominiraju muškarci, kao i da se poštuje gender aspekt.”



*Žena u politici?
Šta kažu poznati?*

1 *Agić Eldina*

karatašica

“Zato što bi žene bolje vodile državu jer većina problema nastaje od strane muškaraca.”

2 *Ajanović Almir*

pjevač

“Podržavam vašu inicijativu i mislim da je premalo žena uključeno u politički život te da se to što prije treba promijeniti. Jedan od razloga za ovakav stav jeste i naučna teza koja potvrđuje da su žene pametnije od muškaraca. Podržavam sve što vodi prosperitetu u društvu, a u ovom slučaju prosperitet su žene.”

3 *Andrić Sijetlana*

glumica

“Činimo 52% biračkog tijela i smatram da angažovanje žene u političkom svijetu treba biti veće iz više razloga. Odgovornost, tolerancija, kompromisnost, uspješnost - samo su neke od stavki koje mogu koristiti i biti produktivne u političkom svijetu, a koje žena itekako posjeduje. Dokaz je da žene u svijetu dobro funkcionišu i otklanjaju predrasudu u svakom smislu, utiču, podstiču i mijenjaju političku svijest na, po mom mišljenju, manje agresivan a produktivan način, neophodan za povoljnu klimu i bolje funkcionisanje države. Dati šansu nekome znači dati šansu sebi, a mislim da glas za ženu jeste šansa.”

4 *Ares Donna*

kantautor

“Razbijmo predrasude!! Ne vidim razloga zašto ne glasati za ženu!

Žena je odgovorna, sposobna, snalažljiva, istrajna, požrtvovana, mudra, obrazovana, prije svega, i šta sve danas nije...

Odavno smatram da muškarac više nije jedini sinonim vođe.

Radije bih postavila pitanje da li je naša okolina spremna za ženu lidera u bilo kojem obliku?

Ja jesam...”

5 *Babović Nurka*

direktorica Centra za socijalni rad Zenica

“Zato što su žene odgovorne, vrijedne, dosljedne, istrajne, manje korumpirane, principijelne, zato što su majke i borit će se za mir i očuvanje mira, pametne, mudre, odmjerene, konstruktivne, dobro organizovane (npr. Žena vodi kuću i misli o svemu: hrani, bolesti, djeci, higijeni o svemu, svemu i nista

ne nedostaje), kada se ovo prenese na posao, državu nema boljeg poredjenja niti velike pameti da se shvati koliko su žene sposobne u svemu. Ako hoćemo promjene onda glasajmo za žene koje se nalaze na listi, te moramo biti podrška jedna drugoj, a ne da gubimo vrijeme i snagu ubjedjujući muške kako je nešto značajno i da trebaju da glasaju za to. Ako hoćemo u Evropu onda uzmimo stvari u svoje ruke i ne čekajmo da se oni dogovore jer očigledno to njima nije važno oni i ne znaju ništa drugo nego da se svadjaju i produžavaju nama agoniju a njima mandate.”

6 *Bajramović Indira*

predsjednica Udruženja žena Romkinja
Bolja budućnost

“Zato što su žene u BiH zapostavljene.

Zato što ih nema na mjestima gdje se donose odluke.

Zato što su za isti posao koji obavljaju kao i muškarci manje plaćene.

Zato što jesu i trebaju biti ravnopravne sa muškarcima.

Zato što ih muškarci iskorištavaju.

Zato što su žene fleksibilnije.

Zato što realno sagledavaju probleme.

Zato što su spremne na kompromise.

Zato što bi gradile škole, ambulante i obdaništa.

Zato što nikad ne bi vodile ratove.

Zato što bi donosile zakone koji bi bili za dobrobit svih građana.

Zato što se prije dogovaraju nego muškarci.

Zato što su upornije.

Zato što žene inače sve rade i završavaju za muškarce, pa zašto onda ne bi radile za sebe?

Zato što su žene.”

7 *Bartulica Mišo*

pjevač

“Dao bih ženama mogućnost da učestvuju u kreiranju države jer se muškarci baš i nisu pokazali uspješnim. Bitniji je pravi karakter i socijalna osjetljivost, nego da li je muško ili žensko na važnoj poziciji. Vrijeme je da se nešto desi.”

8 *Bišćević Bulend*

fudbaler

“Trebalo bi dati više prostora ženama, odnosno ispoštovati procentualno učešće žena u politici, tj. popraviti procentualnu sliku u izvršnoj i zakonodavnoj vlasti. Mislim da bi se žene na nekim pozicijama puno bolje snalazile od muškaraca. Na taj način bi vjerovatno popravili reputaciju naše države jer sam siguran da bi žene uspjele popraviti ‘iskrivljenu’ sliku o našoj državi u svijetu.”

9 **Blagojević Ognjen**

novinar

“Pustili smo muškarce da nam kroje politiku sve ove godine, pa zašto onda ne bismo jedne godine zamijenili ovu mušku garnituru političara ženskom, te i njima pružili priliku da pokažu šta znaju. Mislim da one ne bi bile ovako pohlepne i ‘đonski’ raspoložene. Mislim da posjeduju odgovorniji nivo ponašanja od muškaraca.”

10 **Blanić Velimir**

glumac

“Smatram da je krajnje vrijeme za neke promjene a žene će ih uspjeti izvesti na najbolji način jer su muškarci preoštri na jeziku i nestrpljivi u pregovaranju.”

11 **Blažević Dunja**

povjesničarka umjetnosti

“Zato što su pametnije i odgovornije. Zato što, ako glasate za njih, neće graditi karijeru da bi uzele novac, nego da urade ono za šta su se kandidovale. Zato što su pametnije i ljepše.”

12 **Brkan Darko**

pokret DOSTA

“Veće učešće žena u politici vodi egalitarnijem društvu, upravo iz razloga što se javnim prihvatanjem i etabliranjem, ne samo žena nego i svih onih drugačijih od tradicionalne matrice percepcije, u kojoj se moć i autoritet poistovjećuju sa muškarcima vođama i zaštitnicima etnonacionalnih grupa/plemena, mijenja iz temelja i uvrijeđeni stav pojedinaca/ki prema društvu, društvenim odnosima, poimanju autoriteta, pa i mnogim društvenim pojavama i procesima. Zbog toga glasati za ženu znači glasati za jednakost, pravdu, ravnopravnost, raznolikost; znači glasati

za obespravljene, a ne za privilegovane; za potlačene, a ne za moćne; za drugačije, a ne uvijek za iste; za ostale, a ne za svoje; znači, u krajnjem slučaju, glasati za građanke i građane, a ne samo za Srbe, Hrvate, Bošnjake...”

13 Broz Svetlana

humanistkinja i književnica

“Zato što su u BiH muškarci već pokazali šta ne znaju, ne umiju i ne žele, a žene još nisu pokazale šta znaju, umiju i žele.”

14 Bubalo Goran

aktivista civilnog društva, direktor projekta CRS-a

“Teže je naći razloge zašto glasati za muškarce, toliko puta su nas prevarili, iznevjerili, dok su žene mnogo pouzdanije, istrajnije, sigurnije. Za ženu znaš da se neće boriti za svoje partikularne interese, no da uvijek gleda šire i dalje. Žene su hrabrije i u iznošenju bolnih ali neophodnih promjena, znate

da neće zakazati i da će neugodan lijek biti koristan. Žene vas neće iznevjeriti i one znače pozitivnu promjenu.”

15 Bukovica Emir

pjevač i gitarista grupe FROZEN CAMELS

“Glasom za ženu pokazali bismo da vjerujemo da jake žene mogu povesti ovu zemlju i ljude u njoj u bolju i toliko očekivanu svjetliju budućnost. Žene su oduvijek bile siva eminencija velikih ‘muških’ uspjeha i najjači stub velikih i uspješnih porodica, pa zaslužuju šansu koju naši muški politički predstavnici već toliko dugo olako propuštaju. Na kraju, ženski glas i bukvalno može biti jak, ali i relaksirajući u nemirnoj i turbulentnoj vlasti i situaciji naše države.”

16 *Butković Benjamin*

urednik deska BHT

“Žene su po prirodi predodređene za stvaranje. One rađaju, drže porodicu na okupu, stoje iza uspjeha svojih životnih saputnika. Žene bolje upravljaju novcem. Žene, te velike pričalice, ipak umiju bolje i pažljivije da slušaju svoje sugovornike. Žene nemaju problem kad treba da priznaju grešku i kažu ‘izvini’. One to smatraju vrlinom, a ne porazom. Žene sporove rješavaju razgovorom i strpljenjem, a ne silom. Na kraju, citirat ću bivšu britansku premijerku Margaret Thatcher – kad želiš da u politici nešto bude rečeno, obrati se muškarcu, kad treba da nešto bude učinjeno, povjeri to ženi.”

17 *Buturović Berin*

pjevač

“21. je stoljeće, žene su ravnopravne sa muškarcima i treba im dati šansu na predstojećim izborima, kao i mnogim drugim mladim ljudima. U većini domova upravo su žene nositeljice tih domaćinstava, sve je na njihovim leđima a one se uspješno nose s tim, stoga im treba dati šansu na predstojećim izborima.”

18 *Cenić Svetlana*

ekonomska analitičarka

“Zato što je teško u istoriji naći puno žena koje su osuđene za ratne zločine, za pljačke i masovnu otimačinu, zato što se ne kriju od odgovornosti tako što formiraju radne grupe, zato što ih svaka životna borba samo tera napred, zato što ne odustaju pred problemima već ih rešavaju, zato što ne traže priznanje za svaki napor koji preduzmu, zato što nemaju izgovor kako

nema političke volje da se stane ukraj ovom javašluku, zato što čine pola čovečanstva a još uvek ih tretiraju kao retku biljku u javnom životu.”

19 *Cocalić Emir*

novinar

“Zato što su žene XXI vijeka odlučnije, energičnije i znaju šta hoće. Siguran sam da svojom energijom mogu danas napraviti puno više od muškaraca. Zato će moj izbor na narednim izborima biti žena.”

20 *Čampara Goran*

frontmen grupe NO RULES

“Potrebno je ostvariti ravnopravnost u političkom životu BiH između žena i muškaraca. Treba dati priliku i ženama, jer mislim da se muškarci dosad nisu pokazali na tom području.”

21 *Čaušević Dado*

pjevač

“Zato što su generalno pametnije od muškaraca i zato što se sa ženama lakše dogovoriti oko svega.”

22 *Čatić Zoran*

novinar

“Zato što je žena.”

23 *Diklić Jasna*

glumica

“Treba govoriti o fenomenu šta je žena u našem okruženju. Žena treba da pokrene lavinu svog položaja u društvu, jer smo mi arhitekti svoje budućnosti. Mi možemo da odlučimo o našem životu sada i da kažemo da nam se ovo ne sviđa, i da odluku donesemo sada i sami. Rađamo se sa svojim duhovnim sposobnostima i nemamo na to uticaja, ali imamo

uticaj na to šta ćemo od toga napraviti. Nadareni smo kao ljudska bića i treba da prepoznamo sposobnosti i talente, i sposobnosti da učestvujemo u kreiranju naše realnosti i sadašnjosti u političkom smislu. Ne možemo na sve uticati, ali treba da razmislimo tačno što je to što prouzrokuje naše životne prilike i treba da kažemo sebi umjesto: ‘Zašto baš ja?’, ‘Mogu baš ja.’ To je upravo trenutak kada se doživi jedan prijatan osjećaj da nastaje potrebna snaga, dovoljna da naše probleme pretvori i u sreću.”

24 *Dr. ZOO*
reper

“Ako bi stranka čiji je kandidat na predstojećim izborima žena imala dobru propagandu i borila se za prave stvari, naravno da bih glasao za ženu. Žena ili muškarac, to mi uopće ne predstavlja problem.”

25 *Dukić Sandra*
umjetnica

“U principu, u stvarima koje se tiču i žena i muškaraca, treba da odlučuju ravnopravno, dakle i žene i muškarci. Da se ne bi desila situacija kao poslije rata, kada je bio manjak žena u skupštini i kada su o nekim važnim pitanjima koja se tiču žena, ustvari odlučivali muškarci.”

26 *Duraković Ferida*
književnica

“Zašto treba glasati za žene? Ako ne zbog intenzivnijeg osjećanja odgovornosti za povjerene dužnosti, u šta vjerujem kad se radi o ženama, za žene treba glasati barem zbog promjene: trebalo bi da vidimo barem jednom kako to državu vode žene. Kad god mislim o ženama u politici, vidim Shirin Ebadi, vidim Aung San Kyi, vidim Benazir Bhutto, a šta vidim kod nas? Odgovor je na glasačima: pokušajte promjenu - neće boljeti a može biti korisno.”

27 *Džumhur Jasminka*

Ekspertica za jednakost spolova i članica
Međunarodne komisije za nestale u BiH

“Zato što je to pravo propisano za oba spola. Drugo, dugogodišnje upravljanje od strane muškaraca je pokazalo visok stepen nesenzibiliziranosti za ljudska prava, a samim tim i za svaku individuu bez obzira na spol i opredjeljenje. Treće, predstavlja izazov da kreiramo drugačije okruženje, što bi za posljedicu trebalo imati drugačije odluke u društvu, a što svjetski trendovi pokazuju kroz zauzimanje žena u politici, naprimjer, Jadranke Kosor, Angele Merkel, Hillary Clinton... Teško da se žene mogu dovoditi u vezu s korupcijom i teškim oblicima organiziranog kriminala. Zašto ne omogućiti uživanje prava, propisanih u Ustavu BiH i zakonu u BiH, da ne budu samo formalna nego i suštinska prava?”

28 *Daković Mato*

urednik i voditelj

“Zato što je žena sinonim za majku, a majke svoju djecu ne šalju u ratove. Svijet bi bio mirniji i pošteniji i bolje bi se živjelo. U našoj državi treba da se napravi zamjena: koliko ima žena toliko da ima i muškaraca, i koliko ima muškaraca da toliko bude i žena.”

29 *Durevska Nada*

glumica

“Sve velike ljude su rodile žene.”

30 *Fazlić Fazla Zlatan*

pjevač

“Nisam tip koji dijeli ljude prema boji kože, spolu ili koeficijentu inteligencije. Mislim da oko toga uopće ne bismo trebali praviti razliku, te da ženama treba dati priliku kakvu imaju i muškarci u politici. Ljude treba vrednovati prema njihovim kvalifikacijama i sposobnostima, tj. trebamo pratiti trend zapadnih civilizacija.”

31 *Fetahagić Sead*

književnik

“Zato što je naše društvo muško, šovinističko i treba izjednačiti taj odnos između muškaraca i žena i zato što su žene mnogo finije i suptilnije nego muškarci koji samo vode ratove.”

32 *Filipović Tarik*

glumac

“Da je bilo više žena u politici, tj. da je bilo više vladarica, predsjednica i kraljica, sigurno bi bilo manje ratova. Žene donose na svijet ono najvrednije i najljepše, donose život. Trebali bismo prožeti i propeti kroz politiku i žene, trebali bismo im dati više prostora u politici.”

33 *Gjiva Nazif*

pjevač i kantautor

“Iz hiljadu razloga: potrebno je što više žena na svim nivoima vlasti, barem 30% žena, jer su one za demokraciju, jer su odgovornije, pažljivije, naročito žene koje imaju djecu - one su osjetljivije i poboljšale bi političku situaciju, amortizirale bi nacionaliste, žučne rasprave i dovele našu zemlju u Evropu.”

34 Grebo Zdravko

profesor Pravnog fakulteta u Sarajevu

“Budući da u posljednjih 20 godina u BiH vlada etničko glasanje, tj. glasanje za etničke stranke, koje nisu političke stranke, već politički pokreti, a čak ni oni nisu imali ženu na svojim listama ili među simpatizerima, što dovoljno govori o položaju žena u politici. Na postojećim izborima volio bih kada bi se uveo jedan od ova dva sistema, koji bi omogućio potlačenim i podređenim grupama (mladima, ženama ili bilo kojim podređenim skupinama):

1.) postaviti ‘kvote’ na izbornim listama koje bi stranke ponudile, a gdje bi bili bolje kotirani oni koji pripadaju podređenim grupama

2.) da se ostvari mehanizam ‘pozitivne diskriminacije’ koji bi dao dodatna prava onim grupama.

Moj konačni stav je: ‘Glasaj onako kako živiš’, a žene u BiH znaju kako žive. Počnimo od toga da žene glasaju za žene, a ja ću glasati za ženu!”

35 Gladžimerović Bakir

novinar

“Za žene treba glasati zato što su žene.”

36 Gladžović Dženan

klavijaturista grupe ZONA ISKLJUČENJA

“Žene nas nisu uvukle u sve ove probleme, prema tome, zašto im ne dati šansu na predstojećim izborima?”

37 Havel Mirsada

autorica Tuzlanskog kuhara

“Zato što će žene istrajati i neće pokleknuti pred problemima, za razliku od muškaraca. Broj žena u parlamentu i vladi BiH je jako mali i ja ih želim puno više, kao što je to već u ostalim zemljama svijeta. Jeste da se broj žena povećao u političkom životu BiH, ali ja još uvijek nisam zadovoljna tim brojem, prvenstveno u svom kantonu. Mi

imamo dosta kvalitetnih školovanih žena, koje pored svih svojih obaveza u porodici stignu uraditi savjesno i svoje poslovne obaveze. Mislim da bi nas ovakve žene trebale izbaviti iz situacije u kakvoj sada jesmo.”

38 *Horozović Ajnuša*
umjetnica

“Upravo zato jer je žena sve civilizacije rodila, rodila je domovinu u kojoj živimo, jer je njen glas sjajan i veličanstven. Zato jer je pametna i vidovita, zbog unutarnjih vrijednosti koje posjeduje. Zbog slobode da realizuje svoje stoljećima zapamćeno iskustvo. Zato što može da projicira, a samim tim i realizira budućnost svoje djece, dakle domovine koju rađa. Zato što je odgovorna i, zbog svoje savjesti, obavezna da prati svoju djecu i upućuje ih u one vizije koje su kod žena dobronamjerne, plemenite i, što se tiče progresa njene djece, na najvećem nivou. Pošto je naša majka domovina u tranziciji, moramo uzeti u obzir da su mnoge žene žrtve

muškog terorizma, trafikinga, ratnog profiterstva, tu činjenicu da su mnoge žene i ‘progutane’ u toj tranziciji od svoje majke zemlje ‘domovine’. Imamo i tu stranu koja je užasna, pogubna. Moramo uzeti u obzir i sve propale žene i žene koje su otišle na stranputicu. Moramo uzeti u obzir i teror vladajuće muške ratne stihije, koja ih je pomela da bi u ime zdrave ženske populacije glasali za ženu, tj. one grupacije žena koje su posvećene političkom vođstvu u ime njihove djece i koje predstavljaju i podrazumijevaju sve ženske žrtve rata. Govorim samo u kontekstu sadašnje situacije u kojoj se nalazimo i na koje zdrava žena može djelovati. S obzirom na psihologiju žene i njene zdrave ciljeve, jer je potrebna velika energija da bi se mogla realizirati, i potrebna joj je podrška svih segmenata društva i obitelji kao osnovne ćelije.”

39 *Hrišum Aleksandar*

novinar i voditelj

“A woman’s guess is much more accurate than a man’s certainty’ - zapisao je Kipling: Žena i kada nagađa to bolje zvuči nego kada nas muškarac u nešto uvjerava. Ja ću lično glasati za dame na izborima u oktobru 2010. godine, a Vi?!”

40 *Hurem Samira*

šefica ŽNK SFK

“Žene su predodređene za stvaranje porodice, samim tim su predodređene da stvaraju državu. U svojim porodicama stvaraju mir i sklad, zašto bi sa državom bilo drugačije? Žene su te koje grade, a ne one koje ruše. Svaka žena koja je došla do mjesta odlučivanja, došla je znanjem i govornim sposobnostima, čime se ne mogu pohvaliti političari. Ljuti me zašto žene uopće moraju opravdavati svoje pravo da učestvuju u političkom životu, nešto što je muškarcima dato samo zato što su muškarci.”

41 *Imamović Damir*

pjevač

“Zato što treba glasati za bolju kandidatkinju.”

42 *Inić Branka*

pravnica

“Kandidovanje žena u izbornom procesu predstavlja i osnovni cilj demokratizacije, što istovremeno znači postizanje ravnopravnosti svih članova i članica društva.

To ne znači prosto uključivanje podjednakog broja žena i muškaraca u izborni proces, ili podjednakog broja žena i muškaraca u razvojne aktivnosti, niti njihovo tretiranje na isti način. To zapravo podrazumijeva uključivanje ženskih i muških razvojnih interesa u sve ekonomske, političke i društvene sfere, tako da oba spola imaju dobrobit.

Kandidovanje žena u izbornom procesu i njihova ravnopravnost u tom procesu je veoma bitna, jer ravnopravnost muškaraca i žena je fundamentalna dimenzija zaštite i promovisanja ljudskih

prava i sadrži snažne indikatore za ravnopravnost i stepen demokratizacije.

Ravnopravna zastupljenost spolova u izbornom procesu, učešće u tijelima vlasti na svim nivoima, predstavlja istovremeno i ekonomski i društveni doprinos u razvojnom procesu društva. Posebno zbog toga što države ne smiju sebi dopustiti da ignorišu ekonomski i društveni doprinos svih svojih članova i članica, jer u krajnjem slučaju svaki građanin i građanka imaju pravo na najbolji mogući kvalitet života, kao mikrodimenziju razvoja društva.”

43 *Jahić Dženan*

pjevač i plesač

“Žene su veoma inteligentne osobe. Našom politikom vladaju muškarci, ali žena bi mogla da unese pometnju i revoluciju među muškarcima u politici. Danas u svijetu ‘pali’ fizički izgled, te bi osoba sa dobrim fizičkim izgledom i jakom retorikom mogla biti rješenje naših problema.”

44 *Jašarević Aida*

pjevačica grupe Erato

“Poznato je da su u svijetu žene sve više na ključnim i važnim pozicijama. Prema statistici, u 98% slučajeva žene su vlasnice bankovnih računa i kreditnih kartica, dok u 89% slučajeva kupovine, bila to porodična ili kupovina nekretnina, glavnu odluku donosi žena. Također, mislim da bi žena bila jako uspješna i u političkom životu, prema tome, zašto ne bih glasala za ženu na predstojećim izborima?”

45 *Jergović Miljenko*

književnik i novinar

“Mislim da za ženu treba glasati jer u BiH, kao i u mnogim drugim balkanskim zemljama, ima puno budala koje neće glasati za ženu na predstojećim izborima.”

46 *Jurišić Duška*

novinarka

“Glasajte za ženu koja će odgovoriti na Vašu mail poruku ili upit, koja se javi na telefon, bez obzira što je riječ o privatnom broju mobitela i odgovori na Vaše, uvijek, teško pitanje ili kojoj pošaljete pismo, a ona ga ne ostavi bez odgovora. Dajte joj priliku da ispuni svoje obećanje.”

47 *Kajtar Sead*

fudbaler

“Žene su ravnopravne muškarcima. Bog kako je stvorio muškarca, tako je stvorio i ženu. Po Božijem pravu, žena ima ista prava kao i muškarac. Zašto onda ne glasati za ženu?”

48 *Kapetanović Irina*

pjevačica STORM

“Mislim da žene vladaju svijetom iz sjenke, i to vrlo pametno i suptilno. Primjer takve žene je Hillary Clinton. Došlo je vrijeme da se u našem demokratskom društvu oslobodimo okova šovinizma i da napokon damo priliku sposobnoj i pametnoj ženi da vodi ovu državu. Žena se neće razbacivati testosteronom kao što to sadašnji političari rade, te izazivati rat i strah kod ljudi, jer ona nema tu vrstu kompleksa.”

49 *Kopanja Željko*

direktor NIGD “DNN”

“Glasao bih za ženu zato što su one manje inficirane onim najprljavijim u politici. Uvjeren sam da bi one puno bolje rješavale probleme u politici i to fer-plej igrom.”

50 *Trukić Slavo**doktor socioloških nauka*

“Ženski dio populacije, prije svega, čini polovicu (po procjenama, čak i nešto više) ukupnoga stanovništva BiH. Sukladno tome je logično da u približno istoj mjeri participiraju i u uređivanju svoga, ali i ukupnog društvenog života zemlje. Po sadašnjem stanju stvari, nažalost, stvarnost je puno sumornija. Po najoptimističnijim procjenama, naime, udio participacije žena u strukturi onih koji, na raznim razinama organizacije države i društva, profiliraju i sadašnjost i budućnost BiH, ne prelazi dvadesetak procenata. Ima li se, potom, u vidu podatak kakav je stvarni intenzitet utjecaja žene, navedeni postotak je, po mojoj osobnoj procjeni, i značajno niži. A sve to, onda, govori o naglašenom fenomenu rodne neravnopravnosti.

Nerijetko se, potom, i u slučaju da se takvo stanje priznaje, poseže za ‘logičnim’ obrazloženjima. Žena je, kažu, slabiji spol, s bitno manjom razinom ambicija, naglašenijim roditeljskim

instinktom od muškarca kojega joj, gurajući je u grotlo društvenog nereda, ne treba uništavati, za poslove upravljanja objektivno manje sposobnom od muškarca, impulzivnija itd. Sve to, međutim, ne odgovara istini. Potpuno suprotno. Sva u svijetu provedena istraživanja upućuju na sasvim suprotan smjer razmišljanja. Mnogi svjetski primjeri – sudjelovanje u vojsci ravnopravno s muškarcem, obavljanje najtežih poslova poput onih u rudnicima i slično – govore u prilog sudu kako fizičke mogućnosti žene ne treba podcjenjivati. No, ta vrsta stereotipa i nije najznačajnija. Žena je, u pravilu, stabilnija od muškarca, sistematičnija, kompletnija. Više je, istina, posvećena i obitelji. No, ta činjenica ne dovodi pod znak pitanja njezin društveni angažman kao angažman koji može i treba imati isti intenzitet kao i onaj kod muškarca. Obračun, prema tome, sa stereotipima koji su isključivo proizvod kulture – a nikako i objektivno postojećih razlika – pretpostavka su iskakanja iz okova povijesnog i usvajanja vrijednosti postmodernoga. Taj obračun se, istina, ne

može reducirati na samo jednu dimenziju, pa o ma kakvoj se dimenziji radilo – utjecaju žene u umjetnosti, znanosti, upravljanju društvenim poslovima, velikim gospodarskim sustavima i slično. On, hoću reći, mora imati formu frontalnoga. Ali, sve to ne slabi ni snagu pojedinačnoga, obračuna u svakoj sferi života i rada ponaosob, potrebu oslobađanja okova tradicionalnog, među njima i oslobađanje od tereta stereotipija da je ženi mjesto u kući i da je ne treba ‘tjerati’ u prostor političkog, menadžerskog, neprirodnog, prostor u kojem se ne snalazi i koji je protiv njezina prirodnog bića.

Glas za ženu je, prema tome, glas za novu, humaniju i istinsku stvarnost – onu u kojoj je čovjek jednako vrijedan bez obzira na sve njegove posebnosti i razlike (pa i one spolne) u odnosu na drugoga.

I prihvaćam geslo – vrijeme je za promjene. A jedna od tih promjena bi se, što jes’-jes’, mogla ticati i spolne strukture onih koji zemljom upravljaju. Sve kalvarije zadnjih dvadeset

godina možemo ‘zahvaliti’ ‘jačem’ spolu. Vrijeme je, dakle, da se šansa dade i onom drugom, ‘slabijem’. Taj kulturološki stvoreni ‘hendikep’, siguran sam, žena bi mogla nadoknaditi s više razuma, mudrosti i pameti. Onim, dakle, što nam u posljednjih dvadeset godina nedostaje.”

51 *Kulenović Velida*

novinarka

“Više je razloga zbog kojih smatram da treba glasati za žene na izborima, posebno kada se pred nama nađu otvorene izborne liste. Na ovaj način, pored ispunjavanja demokratskog prava da učestvujemo i biramo naše predstavnike/ce, potičemo žene za njihovo veće učešće u politici. Povećanje broja žena istovremeno znači oslobađanje pa čak i eliminaciju tradicionalnog razmišljanja da žene nisu dorasle političkoj ulozi ili da su nesposobne za takvo što. To je i poruka političkim partijama da žene političarke trebaju uvažavati kao ravnopravne članice političke stranke a ne kao dekor na

izbornim listama ili još jedan glas više za stranačke odluke. Mada veći broj izabranih žena istovremeno ne znači i njihov veći broj u izvršnim organima vlasti, značajnijim učešćem žena u politici, lobiranjem i javnim zagovaranjem glasanja za žene mogao bi se vremenom očekivati veći broj žena na značajnijim funkcijama koje su rezervirane za muškarce. Odbacivanje tradicionalnog načina razmišljanja i ženska solidarnost kod zaokruživanja kandidatkinja na izbornim listama mogla bi sigurno doprinijeti promjenama koje bi značile ne samo demokratske promjene u društvu nego i odbacivanje tvrdnji da se ne može promijeniti postojeće stanje. Ako dajemo glas ženama političarkama koje bi mogle uživati naše povjerenje i za koje cijenimo da svojim znanjem, vještinama i sposobnošću mogu kreirati promjene u društvu, time osiguravamo mogućnost da utičemo na donošenje odluka i da se mi bavimo politikom a ne ona nama.”

52 *Kuric Mirvad*

glumac

“Nema razloga zašto ne glasati za sposobnu ženu koja je vrijedna, radna i ispunjava svoja obećanja. Žene su u mnogim poslovima bolje od muškaraca, a posebno u onim organizacijskim. A politika se zasniva na organizaciji. I, žene su sigurno odgovornije od muškaraca.”

53 *Kurtović Senka*

novinarica

“Dakle, ako želimo promjene, možda je vrijeme da glasamo malo i srcem, da probamo malo drugačije, da ženama damo više prilika, da konačno vidimo jesmo li spremne na to i da nakon toga prestanemo kukati kako nismo dobile ili imale priliku.”

54 *Kurtović Elvis*

tekstopisac, kompozitor i kolumnista

“Žene su majke koje hoće najbolje za svoju djecu, dok muškarci ne brinu dovoljno. Ako je žena na funkciji ona će se bolje brinuti za svoje građane.”

55 *Lakić Mara*

košarkašica

“Žene su puno jače i izdržljivije od muškaraca, te sam uvjeren sam da bi one puno lakše riješile neke probleme i da bi se puno bolje nosile sa poteškoćama koje se javljaju u politici. Žene su također dosta fleksibilnije od muškaraca, što im omogućava puno brže rješavanje neprilika i problema. I po samoj prirodi žena je jači spol, a primjer toga je da žena bolje podnese gubitak muža nego muž gubitak žene. Radi svih gore navedenih razloga mislim da bi ženama trebalo dati priliku u politici.”

56 *Lasić Mile*

sociolog

“Poslije 18 godina života u Njemačkoj naučio sam nekoliko stvari. Prvo, moji njemački prijatelji su me naučili da je njemačko privredno čudo u prvom redu bila stvar njemačkih žena, koje su potpuno nadomjestile gubitak sedam milijuna njemačkih muškaraca. Drugo, u suštinskoj, moralno-političkoj revoluciji ‘70-ih i ‘80-ih godina, koju su isprovocirali i proveli njemački “zeleni”, ravnopravnu, ako ne i odlučujuću ulogu imale su njemačke žene, unoseći mjeru stvari, etiku i estetiku u svakodnevnu politiku. Tako je to i danas, i moja poruka je: glasajmo za bh. žene, jer i one to mogu i znaju.”

57 *Lugavić Kice Enver*

pjevač

“Glasao bih za ženu zato što i njima treba dati priliku, jer dosad nikad nisu vodile tu glavnu riječ. Mislim da su žene manje korumpirane i da su manje sklone malverzacijama.”

58 *Mejra Majka*

aktivistkinja

“1. Svaki glas za ženu je potreban, naročito od ženske strane.
2. Zato što su žene sasvim malo ili nimalo zastupljene kako u opštinskoj vlasti, tako i u Federaciji BiH.
3. Svaka žena u BiH treba da da glas za ženu jer je važan moto ZAJEDNO SMO JAČE. Mi u BiH imamo dosta sposobnih žena koje su spremne da odlučuju šta je bolje za našu državu. Žene će da postave državu na pravo mjesto i više doprinesu kako običnim građanima/kama, kako penzionerima/kama, tako i pri zapošljavanju mladih. Treba nam i žena koje će učiniti da privreda i poljoprivreda bolje rade. Žene su sposobne da ovu zemlju izvuku iz kolapsa. Naša opština ima zaposlenih 90% žena na mjestima odlučivanja. Ne treba da je jedna žena ljubomorna na drugu ženu ako je ova sposobna, te trebamo da svaka žena da glas za sposobne žene. Izadite na izbore i dajte svoj glas za ženu kandidatkinju.”

59 *Memišević Fadila*

predsjednica Sekcije društva za ugrožene

“Dajem svoj glas za jako važno učešće žene jer je žena u našem tradicionalnom društvu stub porodice. Učešće u političkom životu je važno, ne samo da bude ikebana nego da bude aktivan sudionik u kreiranju politike u BiH. Posebno kad su u pitanju žene: paradoksalno je da ih imamo u parlamentu, čiji glas nije dovoljno snažan, jer činjenica da mi nemamo ministarstvo za ženu i porodicu govori tome u prilog. Zalažem se za aktivno učešće žena, što će onemogućiti nevidljivu diskriminaciju koja je sada prisutna nad ženama, te da žene budu u organima odlučivanja. One su većinom u prosvjeti i u upravnim odborima, ali je taj broj minimalan, a muškarci su tamo gdje se odlučuje. Ukoliko žene dobiju stvarnu političku vlast, onda očekujem da će nevidljiva diskriminacija biti odstranjena samim prisustvom žena na mjestima odlučivanja kao što su upravni odbori, kao što su vodeće funkcije u institucijama, jer žene su kao sekretarice u firmama, a vrlo malo ih je na čelu institucija firmi.”

60 *Midžić Adis*

bubnjar grupe Remark

“Žene mogu odgovoriti na sva pitanja i zahtjeve koji im se postavljaju u životu. Uspijevaju biti dobre domaćice, supruge, majke, radne kolegice, imaju više obaveza od muškaraca i opet stignu sve završiti na vrijeme.”

61 *Mijajlović Marijan*

sportski komentator

“Ako može Indira Gandhi, Jadranka Kosor, Benazir Bhutto, ne vidim razlog zbog kojeg bh. žene ne bi mogle biti na vodećoj funkciji u državi. Potrebna je ravnopravnost i svakako treba dati punu podršku i hrabro pokušati stići i slijediti primjer vodećih zemalja svijeta, u kojima žena zauzima važno mjesto u političkom životu i odlučivanju.”

62 *Milinković Maja*

umjetnica

“Po zakonu prirode na planeti živi jednak broj muškaraca i žena, i samo po tom primarnom, prirodnom uređenju, bilo bi logično da proporcijalno odlučuju o tom društvu u kojem zajedno žive, o tom suživotu. To što se može prenijeti na globalno, kreće od mikro, kreće od porodice, u kojoj ravnopravno odlučuju i muškarac i žena.”

63 *Milojević Milkica*

novinarica

“Kada govorimo o razlozima zbog kojih ženu treba birati, uvijek se prisjetim da se u ovoj zemlji građani često pozivaju na pravdu, traže promjene i tvrde da nacionalna pripadnost nije jedino što je bitno kod čovjeka. Upravo iz tih razloga smatram da treba birati ženu:

1. Da bismo ispravili nepravdu prema polovini građana ove zemlje koji nemaju mogućnost da upravljaju društvom i

novcem poreskih obveznika;

2. Izaberimo ženu za promjenu, zato što svi muškarci-političari, koji su nam obećali promjene, nisu ispunili obećanja. Dakle, pokušajmo sa ženama;

3. Pokažimo da smo zreli građani i da nacionalni identitet nije jedini politički identitet, time što ćemo birati ženu.”

64 *Muhedinović Selma*

kantautorica i pjevačica

“Uloga žena na području Bosne i Hercegovine je ogromna. Bosnu i Hercegovinu sačuvala su upravo naše nene, majke, žene, supruge, koje su ujedno izvele djecu na pravi put. Žene bi trebale imati više mjesta u društvu, gdje bi svojom unutrašnjom energijom mogle srediti nered i smiriti određene situacije.

Muškarci bi se svakako ženama trebali obraćati nježnije i s više poštovanja!”

65 *Musemić Husref*

bivši trener fudbalskog kluba Sarajevo

“Žene su relativno malo zastupljene u politici. Treba i njima dati šansu jer, po onome što su muškarci dosad uradili, ja bih većinu istjerao i postavio žene na njihove pozicije. Primjer uspješne žene u političkom smislu imamo u Hrvatskoj, Njemačkoj i još mnogim drugim evropskim državama, pa sam siguran da bismo i mi trebali dati priliku ženama na nekim ključnim pozicijama u vladi i parlamentu.”

66 *Pašić Predrag*

fudbaler

“Žene su u intelektualnom smislu sasvim ravnopravne muškarcu pa bi, prema tome, bile sasvim sigurno ravnopravne i u politici, odnosno političkim aktivnostima. Žena je po prirodi racionalnija od muškarca i bolje bi prosudila da li je nešto dobro ili nije. Svakako bi bilo puno bolje kada bi ih bilo više u politici.”

67 *Pehar Lidija*

profesorica na Filozofskom fakultetu u Sarajevu

“Zato što bi žena provjerenih kvaliteta bila dosta uspješna u političkom životu BiH.”

68 *Rebac Amela*

novinarka

“Iako je ex Yu u ‘onim mračnim socijalističkim vremenima’ imala prvu premijerku u Evropi (Savka Dabčević-Kučar), u svijetlim vremenima demokracije mi ispočetka moramo učiti i govoriti o ženskim pravima i o važnosti prisustva žene u javnom i političkom životu, ne samo BiH nego svake demokratski orijentirane države.

Da Ustav BiH ne propisuje određenu kvotu žena u bh. parlamentu, ne vjerujem da bi u taj muški svijet žena ikada kročila a kamoli predložila neki zakon. Žene su, nažalost, toliko nezainteresirane za politiku da su im i zakon o trudničkom bolovanju skrojili i predložili muškarci.

Jadni pokušaji nekih političkih stranaka koje su u svoje redove dovele neke estradne ženske zvijezde nisu urodile plodom. Žene u politici, čini se, nikada nije bilo manje. Žene su nezainteresirane, inertne, prezauzete i u velikom broju indoktrinirane mišljenjem sredine. Naš konzervativizam i tradicionalizam uzeo je svoj danak! Nakon kuhanja, peglanja košulja, čišćenja, razgovora sa pubertetlijom, buntovnikom, pisanja doktorata... odlaska na posao... kako naći vremena za politiku? Drugi problem bh. žena je da u većini slučajeva nemaju svoje mišljenje nego mišljenje svoga muža, što gasi svaku solidarnost među nama (žene u drugim zemljama glasaju za žene a nama to ne pada na pamet). Na porodičnim sjedeljama i u uredima ponavljamo obično riječi svoga muža „ta će ona kurava... da išta vrijedi ne bi joj politika bila zanimacija, bolje joj je da se uda...i sl.

Sklona sam vjerovati da bi sa većim brojem žena u političkom životu sadašnjost i budućnost BiH bila, ako ne sigurnija onda svakako mirnija. Hajde, recite realno, kojoj je od nas do bitke i rata u kojima ginu djeca koju smo mi rađale, kojoj je od nas

do kaprica i nepomirljivih stavova, zapjenjenih govora, mržnje, jada i bijede koji nas sada okružuju.

Hormoni i naslijeđe pokazuju da smo mi spremnije za razgovore i dogovore nego za ratove i pregovore, sada kada je razgovarati i dogovarati se od životne važnosti za BiH. Zakoračimo hrabro tamo gdje nam je odavno mjesto i gdje ćemo vladati razumom i znanjem, zakoračimo u zvjerinjak, zakoračimo u ring, zakoračimo u javni politički život BiH.”

69 Režak Boris
pjevač

“Pjesmu koju upravo pišem posvećujem vama, ženama. Zove se “Ptica mila”. Čitav život pišem pjesme za žene, za tu borbu dajem svoj glas kroz pjesmu. Volio bih da žene imaju veću ulogu u društvu, ali znam da će i to vrijeme doći, jer žene idu naprijed. Vrlo brzo će postati dominantnije, i ne bi bilo loše, jer ne bi bilo ratova i svijet bi bio ljepši.”

70 Rondić Adnan
novinar

“Vrlo važno je glasati, i to je najvažnija stvar u cijeloj priči. U toj varijanti kao korak dalje i jeste davanje prilike ženama da odluče. Tri su dovoljna razloga zbog kojih treba glasati za žene: žene jesu bolji dio svijeta, zrelije donose odluke, i pet puta mjere, a jednom sijeku, što je važno u politici. Svi smo okruženi ženama i možemo ovo prepoznati u svojim majkama, sestrama, suprugama. Kada govorimo o razlozima, trebamo krenuti od žena koje su u našem okruženju i svih njihovih osobina.”

71 Savić Jadranka
sportska radnica

“Glasala bih za žene iz istog razloga zbog kojeg bih glasala i za muškarce.”

72 Seksan Aleksandar

glumac

“Ne postoji diskriminacija između žena i muškaraca u politici, jer su i žene jednako sposobne. Žene su čak i odgovornije i sposobnije u nekim stvarima od muškaraca, prema tome, zašto ne dati glas ženi?”

73 Seksan Vedrana

novinarka i glumica

“Prije svega, glasala bih za osobu kojoj je interes BiH ispred njenog interesa, za osobu koje će moje dijete da voli kao i svoje, naravno, u smislu bolje budućnosti koju im nudimo i za nekog ko obraća pažnju šta će biti s BiH za 10 godina. Ne dijelim ljude prema spolu već na dobre i loše, odnosno nesposobne i sposobne ako su u pitanju političari. Ako se pojavi takva osoba koja ispunjava gore navedene uslove, glasat ću za nju, nebitno, bio to muškarac ili žena.”

74 Sijamija Ermin

glumac

“Žene se puno lakše snalaze u nekim problemima koje donosi politika. Muškarcima njihova sujeta ne dozvoljava neke stvari, a žene nemaju tih problema. U 90% slučajeva muškarci su na položajima iz ličnih interesa i mislim da se pametna i obrazovana žena ne bi snašla u toj situaciji, jer ona nema tih namjera. Ali svakako da bih glasao za pametnu, inteligentnu, šarmantnu, komunikativnu i obrazovanu ženu i za ženu koja je kadra donijeti korjenite promjene u našoj politici.”

75 Spahić Besim

profesor na Fakultetu političkih nauka u Sarajevu

“Nisam ni u jednoj partiji, niti ću biti na listama. Za ženu bih glasao zato što bi tada konacno na nekoj od vodećih funkcija imali PRAVOG MUSKARCA. Žene su u principu suptilnije i imaju materinski osjećaj i do grada, i do županije i entiteta, pa i države. Imaju više socijalnog sluha od muškaraca.”

76 *Spahić Emir*

kapiten fudbalske reprezentacije BiH

“A zašto da ne!? Ne znam zašto su muškarci pametniji od žena. U najrazvijenijim državama žene su na vodećim pozicijama i upravljaju državama bez problema. Mislim da i mi trebamo slijediti takve primjere i riješiti se predrasuda, koje su kod nas prisutne kada su žene u pitanju”.

77 *Spaho Lejla*

aktivistkinja, profesorica, arhitektica

“Kao prvo i najvažnije, žena nema na mjestima odlučivanja kako u političkom, tako i u privrednom pogledu.

1. Iako se pregovara o izmjeni Ustava, niko ne razmišlja da u sklopu političkih partija treba da se uključe i žene, kao populacija koja čini 50% stanovništva.

2. Nadalje, u okviru političkih partija nema dovoljno žena aktivno uključenih u političke događaje i rješavanje pitanja ekonomije i ekonomske politike.

3. Veoma je malo žena u upravnim i nadzornim odborima u preduzećima koja su predmet privatizacije ili su od interesa upravljačkih politika.

4. Nema žena u Ekonomsko-socijalnom vijeću. Nezamislivo je da se prilikom formiranja ovog vijeća nije poštovao Zakon o ravnopravnosti spolova.

5. Obrazovane žene su uglavnom državne službenice, ljekarke ili prosvjetne radnice, ali što ima veći stepen obrazovanja i gdje je potreba odlučivanja, tu je žena veoma malo ili gotovo, tj. nikako (naprimjer, državni parlament, državno tužilaštvo, Vrhovni sud i sl.)

6. Zašto glasati za ženu:

a) da bi se ohrabrilostale žene da se aktivno uključe u donošenje odluka u politici, gospodarstvu, privatizaciji preduzeća i ostalih bitnih interesantnih sfera života;

b) da bi se ohrabrile žene da otvaraju privatna preduzeća i svoje znanje ulože u svoje firme;

c) izabrane žene koje se bave politikom ili obnašaju značajne funkcije treba educirati da nije sramota insistirati na određenim zakonima i pravima kada je u pitanju ženski spol.”

78 *Srna Segmedina*

novinarka

“Prije svega zato što je, iz neobjašnjivih razloga, poražavajući procenat dama u politici trenutno. Dakle, vrijeme je da tu sliku promijenimo!

Kao sljedeći razlog navela bih prednosti koje je ženama sama priroda dala, a to su istančan senzibilitet, osjetljivost na probleme drugih i društva u cjelini i intuicija da se isti prepoznaju.

I da zaključim - žene su u stanju da obavljaju više poslova istovremeno, da budu uspješne na svim poljima, što baš i nije osobina muškaraca.

Žene su, jednostavno, savršenija bića.

Naravno, sve ovo odnosi se na visokokvalificirane dame, sa jasnim i konkretnim programima na budućim izborima.”

79 *Stojaković Jadranka*

kantautorica

“Mislim da bi se izborom žene na izborima nacionalna retorika mogla relaksirati, jer su žene emancipovane, ravnopravne u društvu, one su najveće žrtve rata i mislim da bi im trebalo dati šansu kao i drugim depresiranim grupama društva. Ne može nam biti gore nego što je sada.”

80 *Stupar Trifunović Tanja*

književnica

“1. Žene znaju zašto. (Ovo je, zapravo, aluzija na reklamu za pivo Muškarci znaju zašto ili nešto kontra tome.)”

81 *Susmel Jasminka*

novinarka

“Glasala bih apsolutno za ženu. Nijedan otac ne štiti svoju djecu kao što to čini majka. Žena kao predsjednica bi brinula o

državi kao o svojoj kući, dok bi pažnju i ljubav koju posvećuje svojim ukućanima jednako posvećivala i građanima svoje države.”

82 Srdlin “Zoka King” Zoran

novinar, stručni konsultant

“Nije nimalo prijatno razmišljati o ovom pitanju, jer je u svakom naprednom društvu odgovor već unaprijed poznat. Imperativ je da žena u svim društvenim događanjima bude ravnopravna.”

83 Šaković Armin

kompozitor i pjevač

“Žena je temelj kuće a država je jedna velika kuća, i ako hoće da svi u toj kući žive u miru i slozi, trebalo bi biti više žena u politici. Moje mišljenje je da ćemo sa ženom prije do pomirenja. A i po prirodi, žene su staloženije od muškaraca.”

84 Šaran Adnan

vokal grupe SKROZ

“Muškarci su se dokazali kao ne baš dobri političari i vođe. U žene imam više povjerenja jer svaka žena nastoji biti brižna majka i ima bolji pogled na budućnost, odnosno bolju viziju.”

85 Tahirović Nesim

umjetnik

“Zato što su pametnije, samosvjesnije, senzibilnije i zatajnije. Zato što su samouvjerenе, hrabre i dovoljno arogantne da se beskompromisno bore za svoje ideje i svoje ideale, ne uzmičući pred njegovim veličanstvom zvanim ‘muškarac’. Zato što su pravednije, osjećajnije, nježnije, utjecajnije i mnogo manje korumpirane.

Zato što samim svojim postojanjem svijet čine ljepšim i zato što će se svojom ustrajnošću, znanjem, sposobnošću i profesionalnošću boriti da ga takvog ostave u naslijeđe svojoj i

našoj djeci. Zato što su, jednostavno, žene - žene!
I zato što bez njih ne bismo smjeli graditi svoju budućnost, ako želimo da je uopšte imamo i da na nju računamo.”

86 *Tepšić Dijana*

magistrica gender/Rodnih nauka, pjevačica

“Krajnje je vrijeme da se glasa za žene kako bi se povećao trenutno sramotno nizak procenat žena u organima vlasti. Vrijeme je i da se izjednači moć, uticaj i mogućnost odlučivanja između muškaraca i žena jer predugo traje istorijska nejednakost u podzastupljenosti žena u organima vlasti i na mjestima odlučivanja.

Ostvarenje učešća žena u političkom i javnom odlučivanju doprinosi boljem i efikasnijem stvaranju javnih politika postavljanjem drugih političkih prioriteta i stavljanjem novih tema na politički dnevni red, kao i poboljšanje kvaliteta života za sve.

Demokratija više ne smije dopustiti zanemarivanje sposobnosti, znanja, vještina i kreativnosti žena. Veoma je važno da su mišljenja, problemi i interesi žena u potpunosti zastupljeni na svim nivoima i u svim oblastima života i rada. Ukoliko bira žene, društvo može samo napredovati jer je povećanje broja žena na mjestima odlučivanja od suštinskog značaja za društvo u cjelini.

Moramo pružiti podršku i ukazati povjerenje ženama na mjestima odlučivanja u javnom i političkom životu jer imamo veliki broj obrazovanih, istaknutih i uspješnih žena koje treba podržati i što više medijski promovisati, kako bi njihove pozicije i postignuti uspjeh bili što vidljiviji, te kako bi mlade žene u njima vidjele dobar primjer za slijediti. Mnoge žene svakodnevno svojim postignućima ostvaruju velike rezultate i doprinose na polju svih oblasti života i rada. Ženski doprinos veoma je važan za naše društvo u cjelini. Moramo stvoriti takvo okruženje i uslove da žene imaju mogućnosti da se bave političkim i javnim životom.”

87 ***Tešanović Nataša***

direktorica Alternativne televizije

“Zato što su se žene pokazale kao nekorumpiranije, senzibilnije za probleme socijalne prirode i nepotkupljivije u odnosu na muškarce.”

88 ***Topić Tanja***

politička analitičarka

“Mislim da građani trebaju glasati, ne bezuslovno za ženu, već za one ‘prave’. Žene su odgovornije, kultivisanije i ne bahate poput svojih muških kolega.”

89 ***Trifunović Aleksandar***

glavni i odgovorni urednik projekta BUKA

“Između uspješnog muškarca i uspješne žene, ja bih glasao za uspješnu ženu i sigurno ne bih pogriješio”

90 ***Ukić Enes***

pjevač

“Obogatimo društvo mišljenjem, prisustvom i snagom nježnije strane.”

91 ***Vešović Marko***

književnik

“Kada smo bili u Stokholmu povelili su nas u Parlament grada Stokholma gdje smo razgovarali i gdje su nam rekli da je od 100 poslanika 49 žena a i predsjednica parlamenta je žena. Dolazimo iz divljačke zemlje, u kojoj je ženi mjesto iza šporeta. Jedina nada koju ja polažem jeste oslobođenje robovskog dijela čovječanstva koje se zove žene.”

92 **Vidak Slaven**

glumac

“Zato što vjerujem u narodnu izreku da tri ćoška kuće drži žena, i to bih samo projicirao na našu državu. Bilo bi nam puno bolje kada bi tri ćoška ove države držale žene jer su žene po svojoj odrednici puno osjećajnije od muškaraca.”

93 **Naisavljević Ugo**

profesor na Filozofskom fakultetu u Sarajevu

“Najvažnija preporuka da se to učini jeste činjenica da su oduvijek bile isključene iz politike. Rijetke žene na visokom položaju u politici samo potvrđuju tu činjenicu. Svatko tko je isključen iz patrijarhalnog poretka na tako drastičan način kao što su to bile žene iz politike, dobiva veliko povjerenje za sve one koji misle da je patrijarhalni politički poredak loš poredak. Bilo bi doista divno iskušati po prvi put u našoj povijesti pojavljivanje žena u politici na dosad nečuven način.

Posebno povjerenje zasigurno dolazi iz saznanja da su žene oduvijek vodile politiku kućanstva, i da bi onaj prevrat koji se očekuje od demokratske politike, a to je prelazak od ideologije ka ekonomiji, one uistinu bile sposobne izvršiti. Zato glasajmo ovaj put samo za žene.”

94 **Naisavljević Ana**

članica grupe “Elektro pionirke”

“Da bismo razrušili stereotipe!

ONA je pametna, inteligentna, obrazovana i progresivna, a domaćica je odavno prestala da bude! Podržati ovoga puta političku, žensku emancipaciju, kao nastavak borbe za ljudska prava u Bosni i Hercegovini. Žene čine polovinu našeg društva i trebaju imati svoje predstavnike. Ipak, ne trebaju samo žene da glasaju za žene, i na kraju za ženu treba glasati zbog njenog političkog programa a ne samo iz razloga što je žena.”

95 *Yuca Aleksandar*

vokal grupe ATENTAT

“Zato što treba da im damo šansu da speru ljagu sa imena političarki kao što su Margaret Thatcher, Biljana Plavšić...”

96 *Vugdalić Sabahudin Saša*

analitičar, humanista, slobodni novinar

“Žena ima dušu majke jer se ne boji istine, jer je zapostavljena u društvu, jer je vrijeme da se čuje glas žene, GLAS koji može biti samo dobro za društvo, koje nema snagu i čistoću koju može ponuditi žena. Glas za ženu je glas za budućnost društva, a posebno mladih koji su stvarna budućnost, mladih koji vjeruju ženi-majci. Majka je jedna, a suze majke-žene svugdje su iste. Zato treba glasati za ženu.”

97 *Vukadinović Srdan*

profesor na Akademiji dramskih umjetnosti u Tuzli

“Više sam pristalica da se glasa za sposobne i odgovorne ljude, bez obzira da li su muškarci ili žene, crnci ili bijelci, a koji mogu podnijeti teret kojeg politika nosi za sobom.

Imam nekoliko razloga zbog kojih bi trebalo glasati za ženu:

1. Za ženu treba glasati da se razbije tradicionalistička shema da je ženi mjesto samo u privatnoj sferi: ako muškarac ima pravo da se bavi javnom sferom, zašto ne bi mogla i žena.
 2. Da se pokuša razbiti učmala tradicionalna svijest.
 3. Bh. društvo pati od kriminala i korupcije, znamo da je mnogo veći broj kriminalaca koji su muškarci, a da žena ima malo u kriminalu. Postoji mali broj žena koje su optužene za kriminalne radnje.
 4. Korupcija je ogromna pošast koja vlada bh. društvom, i mnogo je veći broj muškaraca koji su optuženi za korupciju, dok je broj žena optuženih za korupciju mnogo manji.
- Ovo su neki od glavnih razloga zašto bih glasao za ženu!”

98 *Zlata Bure Enes*

pjevač i klavijaturista grupe SIKTER

“Trebalo bi da svi imaju iste šanse na izborima zbog ravnopravnosti među spolovima jer i muškarci i žene imaju iste sposobnosti, te su sposobni da budu korumpirani i da prevare državu i građane. Bitniji su drugi kvaliteti i vrijednosti nego to da li je na vlasti muškarac ili žena.”

99 *Zurovac Ljiljana*

Izvršna direktorica Vijeća za štampu u BiH

“Jesam za to da žene budu političke liderke ili na čelu države u BiH. Naravno, obrazovane žene sa širokim pogledima, bez predrasuda. Valjda ih ima barem nekoliko u cijeloj BiH. Konačno, muškarci su pokazali da to ne znaju raditi kako valja, zato dajmo šansu ženama, nemamo druge opcije.”

100 *Žarković Radmila*

književnica

“Glasam za žene sa ženskim senzibilitetom u politici zato što imaju hrabrosti da nazovu stvari pravim imenom, zato što su ih generacije naših majki i baka učile da prepoznaju potrebe i drugih i ranjivih, da rješavaju probleme, pa i one najteže, a ne da bježe od njih, iako je to često komotnije i politički profitabilnije. Glasam za žene koje su se uspjele, unutar svojih političkih partija, izboriti za svoj ženski način političkog djelovanja.”

101 *Ždralović Mirela*

voditeljica Trauma centra HKO Kruh sv. Ante

“Zato što žena na jedan graciozan i sebi prepoznatljiv način može voditi društvo ka prosperitetu. Njena uloga majke i domaćice daje joj odgovornost koja je jednoj osobi na vlasti neophodna. Ljubav, briga, nježnost, organiziranost, pouzdanost, utkane su u ženu. Ovu su neki od 101 razloga zašto glasati za ženu!”

*Originalne recepte za
osnaživanje uloge žena
ponudili:*

Agić Eldina

Ajanović Almir

Andrić Svjetlana

Ares Donna

Babović Nurka

Bajramović Indira

Bartulica Mišo

Biščević Bulend

Blagojević Ognjen

Blanić Velimir

Blažević Dunja

Brkan Darko

Broz Svetlana

Bubalo Goran

Bukovica Emir

Butković Benjamin

Buturović Berin

Cenić Svetlana

Cocalić Emir

Čampara Goran

Čaušević Dado

Ćatić Zoran

Diklić Jasna

Dr. ZOO



Dukić Sandra

Duraković Ferida

Džumhur Jasminka

Đaković Mato

Đurevska Nada

Fazlić Fazla Zlatan

Fetahagić Sead

Filipović Tarik

Gljiva Nazif

Grebo Zdravko

Hadžiomerović Bakir

Hadžović Dženan

Havel Mirsada

Horozović Ajnuša

Hršum Aleksandar

Hurem Samira

Imamović Damir

Inić Branka

Jahić Dženan

Jašarević Aida

Jergović Miljenko

Jurišić Duška

Kajtaž Sead

Kapetanović Irina

Kopanja Željko

Kukić Slavo

Kulenović Velida



Kurić Mirvad

Kurtović Senka

Kurtović Elvis

Lakić Mara

Lasić Mile

Lugavić Kice Enver

Mejra Majka

Memišević Fadila

Midžić Adis

Mijajlović Marijan

Milinković Maja

Milojević Milkica

Muhedinović Selma

Musemić Husref

Pašić Predrag

Pehar Lidija

Rebac Amela

Režak Boris

Rondić Adnan

Savić Jadranka

Seksan Aleksandar

Seksan Vedrana

Sijamija Ermin

Spahić Besim

Spahić Emir

Spaho Lejla

Srna Segmedina

Stojaković Jadranka

Štupar Trifunović Tanja

Susmel Jasminka

Svrđlin “Zoka King” Zoran

Šaković Armin

Šaran Adnan

Tahirović Nesim

Tepšić Dijana

Tešanović Nataša

Topić Tanja

Trifunović Aleksandar

Ukić Enes

Vešović Marko

Vidak Slaven

Vlaisavljević Ugo

Vlaisavljević Ana

Vuca Aleksandar

Vugdalić Sabahudin Saša

Vukadinović Srđan

Zlatar Bure Enes

Zurovac Ljiljana

Žarković Radmila

Ždralović Mirela

